

Premio di Papiamento "Cadushi di Cristal 2008" otorga na Mario Dijkhoff

Diadomingo ultimo, dia 8 di juni 2008, a celebra entrega di e premio prestigioso di Papiamento, '*Cadushi di Cristal*', na señor Mario Dijkhoff, conocido linguista Arubiano. Como cu Mario ta sufri di un kebrante di salud, e evento aki a tuma luga na Hospital Horacio Oduber.

Den presencia di su famia, su coleganan y su amigonan Mario a pasa un ora agradabel. Tabatin un programa alegre cu diferente discurso y declamacion.

E biaha aki e '*Cadushi di Cristal*' ta un obra di arte di nos artista plastico Ciro Abath: un breba crioyo di glas traha cu un tecnica masha special riba un pia di marmer.

Relato di Hurado

Mario Dijkhoff, centro di nos atencion awe relaciona cu '*Cadushi di Cristal*', tur hende presente, famia, amigo y colega di Mario, e laureadonan di '*Cadushi di Cristal*', un caluroso bon bini.

Nos a bini hunto awe pa celebra un evento masha special, cu desde 1997 ta tuma luga cada dos aña: Otorgamento di e premio '*Cadushi di Cristal*'.

Grupo Pa Promove Papiamento (GP3), un comision interdepartamental di gobierno di Aruba, a introduci e premio importante aki '*Cadushi di Cristal*' na aña 1997 cu a keda proclama como aña di Papiamento.

GP3 a stipula e criterionan cu cual e nominadonan mester cumpli, pa bini na remarca pa haya e premio aki. Algun di e criterionan aki ta: E nominado mester ta un persona biba na Aruba cu a destaca riba tereno di Papiamento den e area di literatura of di linguistica, e mester ta activo tambe pafo di su trabou oficial, e mester tin publicacion di calidad relaciona cu Papiamento.

E prome persona cu a ricibi '*Cadushi di Cristal*' ta señora Digna Laclé; esey tabata den e aña di Papiamento, 1997.

Na 1999 Hubert 'Lio' Booi a ricibi e premio aki, na 2001 Ernesto Rosenstand, na 2003 Ramon Todd Dandaré y na 2006 Grupo di Teatro Mascaruba.

Y awe riba dia 8 di juni 2008 ta toca turno na señor Mario Asintho Dijkhoff pa ricibi e di seis '*Cadushi di Cristal*'.

Mario Asintho Dijkhoff a nace na Aruba dia 24 di april 1950.

Despues di a caba su scol secundario aki na Aruba, Mario a cuminsa su estudio di Spaño na Hulanda y a sigui studia na Universidad di Münster, Alemania, caminda el a

obtene su magestria den “*Romanische Philologie* (Spaanse en Portugese taal- en letterkunde)” na 1985. Su materianan secundario ta *Algemene en Vergelijkende taalwetenschap* y *Nederlandse taalkunde*.

Dia prome di maart 1986 Mario a drenta servicio di gobierno di Aruba na Departamento di Enseñansa, caminda e ta traha te dia di awe, cu un intermedio na Instituto di Cultura, na oficina di ministro di Obra Publico y Salubridad y na Arubahuis.

Den e periodo di 22 aña aki Mario a traha incansablemente, tanto den y pafo di Departamento di Enseñansa pa su idioma Papiamentu, den ora di trabou y den su tempo liber.

E hurado cu a evalua e trabounan cu Mario a desplega relaciona cu Papiamentu, tin cuater argumento pa hustifica entrega di e di seis ‘*Cadushi di Cristal*’ na linguista Mario Dijkhoff.

1. Su trabou como linguista

Como linguista Mario a traha den diferente seccion y comision na Departamento di Enseñansa. Pa menciona algun: IDILA (Instituto di Lengua di Aruba), grupo di trabou di ortografia, grupo di trabou di gramatica.

Mario tin hopi publicacion relaciona cu Papiamentu y tin mas na caminda.

Su publicacionnan a cuminsa cu edicion na 1976 di “*Bocabulario Papiamentu-Ulandes/Ulandes-Papiamentu*”, cu a conoce un reedicion na 1978.

Na 1980 Mario y su colega Magali Vos-de Jesús (di felis memoria) a publica “*Dikshonario/Woordenboek: Papiamentu-Ulandes/Ulandes-Papiamentu*”. E dikshonario aki a conoce sigur seis edicion.

Na 1991 e ta publica tomo un y tomo dos di e metodo “*Papiamentu voor beginners*”, te ainda masha pidi.

Na 2000 ta sali riba mercado su buki “*Gramatica di Papiamentu*” y na 2001 “*Terminologia Gramatica*”.

Na aña 2002 Mario ta publica “*Sinonimo y reduplicacion*”.

Banda di e bukinan aki tin contribucion di Mario tocante gramatica y ortografia den revista manera *Kontakto Antiano*, *Progreso*, *De Klok*, *Enfasis*, *Bringawaya*, den e coleccion “*Homenahe na Raúl Römer*” y den corant manera *Beurs- en Nieuwsberichten* y *Bon Dia Aruba*.

Ta hopi importante pa menciona, cu Mario ta haci hopi trabou di coreccion y di redaccion di tur sorto di texto cu mester publica.

2. Su contribucion na aceptacion y conservacion di Papiamentu den comunidad

Mario a lanta un fundacion independiente “Papiando Papiamentu” pa duna informacion den den corant, na radio y television, pa duna charla y pa organisa curso di gramatica y di ortografia di Papiamentu. E cursonan aki a haya fama y tabata bon concuri.

Colecciona dicho y proverbio y palabra di antaño ta un trabou favorito di Mario y na 1997 su buki “*Proverbio y dicho di Aruba*” a subi mercado. Na aña 2002 e ta publica dos trabou mas, esta “*Palabra di antaño*” y “*Expresion*”.

3. Su trabou literario

Mario a debuta como poeta cu su coleccion "*Poesia te asta pa bo*" cu a mira lus na 1976. "*Poesia te asta pa bo*" tomo dos ta sigui na 1977. Cuater di e poemanan ta aparece tambe den "Pa saka kara" tomo tres. "Pa saka kara" tomo un ta menciona Mario den diferente capitulo como un poeta importante di Aruba.

"Cosecha Arubiano" cu a keda publica na 1983 ta contene tres poema di Mario.

4. Su trabou den preparacion di docente y corector

Mario a duna les di ortografia y fonologia na diferente estudio di Papiamento pa docencia di di tres y di di dos grado na Instituto Pedagogico Arubano.

Na e curso pa corector cu Departamento di Enseñansa a organisa tambe Mario a percura pa e lesnan di ortografia.

E cuater argumentonan aki tabata decisivo pa e hurado duna su recomendacion pa otorga '*Cadushi di Cristal 2008*' na señor Mario Asintho Dijkhoff.

Hurado:

Joyce Pereira

Wim Rutgers

Ito Tromp

Comision:

Des Croes

Irais Nava

Joyce Pereira

Aruba, 8 di juni 2008